

La pcd vul reacquistar il segund sez

Elecziuns guvernativas 2018 en il Grischun

■ (cp) Il directori da la partida cristiandemocratica (pcd) dal Grischun propona a la radunanza da delegads per ils 23 d'avust 2017 ina candidatura dubla per las tschernas da la Regenza 2018. Tras ina candidatura dubla pussibilescha la pcd al pievel grischun da cumponer da nov la Regenza. Cun l'actual cusseglier guvernativ *Mario Cavigelli* dispona la partida d'ina personalitad fitg respectada en l'entir Chantun per ses engaschi politic e che merita ina reelecziun onurifica per ina terza perioda d'uffizi. La pcd vesa en ses agir dal reminent era grond potenzial tar ina tscherna plain tensiun per ulteriurs sezs en la Regenza, e qua tras era la schanza da na pudair far tut en l'avegnir meglier, ma autramain. Noss Chantun na po betg star airi, mabain duai avair la schanza da pudair daverenar en l'avegnir in spazi pli attractiv.

Per dar novs impuls

Tras in segund commember da la pcd en la Regenza astga la populaziun sperar sin novs impuls per dumagnar cun success las sfidas multifaras en l'avegnir. I va per rinforzar scolaziun e cultura, sco era per liberar nossa pitschna structura economica, numnadamain turissem e mastergn, da la birocrazia surfatga e per dar a las vischnancas daplì dretgs ed autonomia da meglierar en nossas valladas periferas il provediment fundamental. Uschia vegnan las empermischuns da la pcd ademplidas. Per far quai basegna la politica da personal curaschus e ferm che dispona dad experientschas organisatori-



Il suveran grischun vegn a decider l'auter onn davart la nova cumposiziun da la regenza suenter che **Barbara Janom Steiner (pbd)** e **Martin Jäger (ps)** sorteschan. MAD

cas e personalas e che è abel da estructurar e priorisar tar dumondas complexas.

Cumpetenza ed evaluaziun per nominar

Cumpetenta per proponer ina candidatura dubla è la radunanza da delegads da

la pcd grischuna – pia tant per ina candidatura dubla sco era per la nomina dals candidats. Las partidas cirquitalas e regionalas pon far propostas. Pensum dal directori èsi da preschentar ponderaziun ed arguments per ina decisiun fundada. En il decurs dals davos mais ha il directo-

ri analisà da rudent la situaziun da partenza per las elecziuns guvernativas. Cun differentas personalitads da la partida, che vegnan en dumonda per candidar, han ins discurrì ed è era s'infurmà davart lur spetgas e motivaziun. Il directori beneventass la candidatura da deputà *Mar-*

cus Caduff, president da la fracziun cristiandemocratica en il Cussegl grond, ord la pcd dal circol Lumnezia e da la pcd da la Surselva. Marcus Caduff è agronom ETH ed oz CEO da l'Ospital regional Surselva a Glion. El dispona tant politica- sco professionalmain da las experientschas necessarias per correspunder entiramain a las spetgas da la partida per ina candidatura credibla. Era enconuscha el tge ch'è da far per schliar divers projects e da la politica regionala e culturala. Plinavant è el stà confundatur d'in manaschi da gastro ed ha demussà cumpetenza ed insistenza e da pudair lavurar en in team. Marcus Caduff correspunda en tuts regards a las spetgas ed als giavischs da la direzziun da la partida per ina candidatura dubla. Quella ha dad esser credibla, sto correspunder a las pretensiuns da l'uffizi ed avair schanzas realas da vegnir elegi.

La pcd Surselva nominescha

La suprastanza da la pcd Surselva vegn a proponer – per mauns da la radunanza da delegads da la pcd chantunala ils 23 d.q. – da far ina nominaziun or da la Surselva per las elecziuns da la Regenza 2018. Quella radunanza da nominaziun da la pcd Surselva ha lieu ils 16 d'avust 2017 en chasa da scola a Cuschnaus.